

## A UN PASSARIN

*Le cronache raccontano che talvolta, nei giorni di apertura della caccia, i cacciatori finiscono per impallinarsi tra di loro: un movimento improvviso tra le foglie fa intravedere una lepre dove c'è un collega. Ed è talmente tanta la smania di iniziare che talvolta si finisce per sparare ... ad un cinguettio.*

Stamatina gh'evi nessün impegn  
e sunt andai a Bédar par castegn;  
l'eva bunura, e l'eva anmò 'n pù fosch  
quand ma sunt inviaa dent in dul bosch.  
Né machin né moto: l'ünich freccass  
l'eva quell di föi secch muovü di pass,  
ogni tant un quai culp, ma giò, luntan,  
un caciadur, e pö 'l buià d'un can.

E pö l'ha incuminciaa a cantà 'n'üsell,  
e 'n'alt, e 'n'alt, e 'n'alt anmò ... che bell!  
L'eva cumè senti un cuncert da cant  
cun tütt i vari coor spartii in sü i piant:  
i vus bianch in sü 'l nuus, e pö i tenur  
in sü 'l pin, e in sü 'l fò i altar cantur ...  
... dó o tré volt ma sun duvüü fermà  
par mia fa freccass e par scultà ...

.Pam pam!... dó s'ciupetaa, mia tant distant:  
ul cantà l'è cessaa cumè d'incant,  
l'è stai tütt un sbatt d'aal, un vugatà ...  
(speremm ca sian riüssii tücc a scapà).  
Evi sbagliaa, parchè dopu 'n quai pass  
ho vist quaicoss a mövas tacaa a 'n sass,  
l'ho cataa sü in di man: un passarin,  
forzi un nuvèll tant l'eva piscinin ...  
l'ha sbatüü i aar 'na volta püssee fort,  
dó gott da sangh süi diit, e pö l'è mort ...

Poar passarin, sa t'hann sparaa da fa?  
Da ti cusa speravan da mangià?...  
Sa füssat stai 'na quaia o 'n pivium  
podi capì, ven föra 'n quai bucun,  
ma ti te ghe sté tütt in d'un cügiaa...  
chissà 'sa vànzan dopu 'vett penaa.  
Poar passarin, minüdar cuma sett  
nissün l'avria mai pudüü vidett,  
l'è staia la tò vöia da cantà  
ca t'ha tradii ... e la t'ha fai mazzà!

.....

In dul cuncert dul bosch, da sott al nuus,  
duman matina ... mancarà una vuus ...